

萬有文庫

第二集七百種

王雲五主編

石湖居士詩集

(上)

范成大撰

商務印書館發行

石湖居士詩集
(上)
范成大撰



石湖居士詩集

(下)

范成大撰



書 最 本 書 學 國

編主五雲王
庫文有萬
種百七集二第

集詩士居湖石
冊二

中華民國二十六年六月初版

撰者 范成大

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

湘

◆ F二七二六

(本書校對者毛鵬基)

序

予疇昔之晨與客坐堂上遙見一健步黃衣負一笈至庭下呼而誚其奚自曰自參政公范氏也發其笈公之文集在焉索其書讀之則公之子莘叩頭請曰莘不天不自質越而先公一夕奄忽棄其孤莘欲死而不敢者有先公付託之重任在方先公之疾而未病也日夜手編其詩文數年成集凡若干卷逮將易簀執莘手而授之且曰吾集不可以無序篇有序篇非序篇寧無序篇也今四海文字之友惟江西楊誠齋與吾好且我知微斯人疇可以屬斯事小子識之若莘則何敢請而先公之治命不敢墜惟先生哀而諾之予執書抱遺編而泣曰萬里與公同年進士也公先進至爲朝廷大臣與天子論道發政坐廟堂進退百官而萬里環堵荒寒之士也何敢與公友公不我薄陋而辱友之萬里不敢拒公亦不敢以執政侯公也今忽死丁寧之託其何敢辭初公以文學材氣受知壽皇自致大用至杖漢節使強虜卽其庭伏穹廬不肯起袖出私書切責之君臣大驚有自階闥之壁竊位樞臣者其勢方震赫公沮之竟不奉詔而去其所立又有不凡者矣若夫鋤心於山水風月之場彫龍於言語文章之囿此吾輩羈窮酸寒無聊不平之音也公何必能此哉古語曰爭名者必於朝爭利者必於市是二人者使之以此易彼或以彼易此二人者其肯乎哉非不肯也不願也非不願也亦各樂其樂也詩人文士挾其所樂足以敵王公大人之人之所樂不啻也猶將愈之故王公大人無以傲夫士而士亦無所折於王公大人今公乃自屏其所可樂而復力爭夫士之所甚樂所謂不虞君之涉吾地者其不多取乎然公之詩文非能工也不能不工耳公風神

BW T355/05

英邁意氣傾倒拔新領異之談登峯造極之理蕭然如晉宋間人物他人夏夏吃吃而不能出諸口者公曠呻噫欠之間猝然談笑而道之則其詩文之工豈十日一水五日一石之謂也哉甚矣文之難也長於臺閣之體者或短於山林之味諧於時世之嗜者或漓於古雅之風賡奏與記序異曲五七與千百不同調非文之難兼之者難也至於公訓誥具西漢之爾雅賦篇有杜牧之之刻深騷詞得楚人之幽婉序山水則柳子厚傳任俠則太史遷至於詩大篇決流短章斂芒縟而不釀縮而不儻清新嫵麗奄有鮑謝奔逸儔偉窮追太白求其隻字之陳陳一倡之鳴鳴而不可得也今海內詩人不過三四而公皆過之無不及者予於詩豈敢以千里畏人者而於公獨斂衽焉於是文士詩人之難者易偏者兼矣其不盛矣乎嘻人琴今俱亡矣廣陵散今此聲遂絕矣惠子不生莊子不死復何道哉公之別墅曰石湖山水之勝東南絕境也壽皇嘗爲書兩大字以揭之故號石湖居士云公諱成大字至能世爲姑蘇人其世次言行職官則有少保大觀文大丞相益公周公之銘詩在紹熙五年六月十一日誠齋野客楊萬里謹序

序

石湖居士范公待制數文閣來帥成都兼制置成都潼川利夔四道成都地大人衆事已十倍他鎮而四道大抵皆帶蠻夷且北控秦隴所以臨制捍防一失其宜皆足致變故於呼吸顧盼之間以是幕府率窮日夜力理文書應期會而故時巨公大人亦或不得少休及公之至也定規模信命令施利惠農選將治兵未數月聲震四境歲復大登幕府益無事公時從其屬及四方之賓客飲酒賦詩公素以詩名一代故落紙墨未及燥士女萬人已更傳誦被之樂府弦歌或題寫素屏團扇更相贈遺蓋自蜀置帥守以來未有也或曰公之自桂林入蜀也舟車鞍馬之間有詩百餘篇號西征小集尤雋偉蜀人未有見者盍請於公以傳屢請而公不可彌年乃僅得之於是相與刻之而屬游爲序淳熙三年上巳日朝奉郎成都府路安撫司參議官兼四川制置使司參議官山陰陸游序

宋史本傳

范成大，字致能，吳郡人。紹興二十四年擢進士第，授戶曹監和劑局。隆興元年遷正字，累遷著作佐郎。除吏部郎官，言者論其超躐，罷奉祠。起知處州。陞對論力之所及者三，曰日力，曰國力，曰天力。今盡以虛文耗之，上嘉納。處民以爭役囂訟，成大爲勸義役，隨家貧富輸金，買田助當役者。甲乙論第，至二十年，民便之。其後入奏言及此，詔頒其法於諸路。處多山田，梁天監中，詹南二司馬作通濟堰，在松陽遂昌之間，激漢水四十里，溉田二十萬畝，堰歲久壞，成大訪故迹，疊石築防，置堤關四十九所，立水則上中下，灌漑有序，民食其利。除禮部員外郎，兼崇政殿說書。乾道令以絹計贓，估價輕而論罪重，成大奏承平時絹匹不及千錢，而估價過倍。紹興初年遞增五分，爲錢三千足，今絹實貴，當倍時直，上驚曰：「是陷民深文，遂增爲四千而刑輕矣。」隆興再講和，失定受書之禮，上嘗悔之，遷成大起居郎，假資政殿大學士，充金祈請國信使。國書專求陵寢，蓋泛使也。上面諭受書事，成大乞并載書中，不從。金廷使者慕成，大名至求巾幘效之。至燕山，密章奏具言受書式，懷之入，初進國書，詞氣慷慨，金君臣方傾聽，成大忽奏曰：「兩朝旣爲叔姪，而受書禮未稱。」臣有疏，指笏出之。金主大駭曰：「此豈獻書處耶？」左右以笏標起之，成大屹不動，必欲書達，旣而歸館所。金主遣使使宣旨取奏，成大之未起也，金庭紛然。太子欲殺成大，趙王止之，竟得全節而歸。除中書舍人。初，上書崔實政論，賜輔臣成大奏曰：「御書政論，意在飭綱紀，振積敝，而近日大理議刑，遞加一等，此非以嚴致平，乃酷也。」上稱爲知言。張說除簽書樞密院事，成大當制，留詞頭七日不下，又上疏言之。

說命竟寢。知靜江府廣西賓賈。專藉鹽利。漕臣盡取之。於是屬邑有增價抑配之敝。詔復行鈔鹽。漕司拘鈔錢均給所部。而錢不時至。成大入境曰。利害有大於此乎。奏疏謂能裁抑漕司強取之數。以寬郡縣。則科抑可禁止。從之。數年。廣州鹽商上書乞復令客販。宰相可其說。成大出銀錢助之。人多以爲非。下有司議。卒不易成大說。舊法馬以四尺三寸爲限。詔加至四寸以上。成大謂互市四十年。不宜驟改。除敷文閣待制。四川制置使疏言吐蕃青羌兩犯黎州。而□□結蕃列等尤桀黠。輕視中國。臣當教閱將兵。外修堡砦。仍講明教閱團結之法。使人自爲戰。三者非財不可。上賜度牒錢四十萬緡。成大謂西南諸邊。黎爲要地。增戰兵五千。奏置都監路分。吐蕃入寇之路十有八。悉築柵分戍。□□結擾安靜砦。發飛山軍千人赴之。料其三日必遁。已而果然。白水砦將王文才私娶蠻女。常導之寇邊。成大重賞檄羣蠻使相疑貳。俄禽文才以獻。卽斬之。蜀北邊舊有義士三萬。本民兵也。監司郡守雜役之。都統司又俾與大軍更戍。成大力具其不可。詔遵舊法。蜀知名士孫松壽年六十餘。樊漢廣甫五十九。皆挂冠不仕。表其節。詔召之。皆不起。蜀士由是歸心。凡人才可用者。悉致幕下。用所長不拘小節。其傑然者。露章薦之。往往顯於朝。位至二府。召對除權吏部尙書。拜參知政事。兩月爲言者所論。奉祠。起知明州。奏罷海物之獻。除端明殿學士。尋帥金陵。會歲旱。奏移軍儲米二十萬賑飢民。減租米五萬。水賊徐五竊發。號靜江大將軍。捕而戮之。以病請閒。進資政殿學士。再領洞霄宮。紹興二年加大學士。四年薨。成大素有文名。尤工於詩。上嘗命陳俊卿擇文士掌內制。俊卿以成大及張震對。自號石湖。有石湖集。攬轡錄。桂海虞衡集。行於世。

石湖居士詩集目次

卷一

詩四十六首

卷二

詩五十四首

卷三

詩六十三首

卷四

詩六十七首

卷五

詩五十一首

卷六

詩四十三首

卷七

詩四十九首

卷八

詩五十二首

卷九

詩五十一首

卷十

詩五十九首

卷十一

詩六十五首

卷十二

詩七十二首

卷十三

詩四十四首

卷十四

詩五十四首

卷十五

詩六十九首

卷十六

詩六十五首

卷十七

詩六十九首

卷十八

詩六十首

卷十九

詩五十二首

卷二十

詩八十四首

卷二十一

詩六十首

卷二十二

詩四十二首

卷二十三

詩七十二首

卷二十四

詩七十首

卷二十五

詩六十三首

卷二十六

詩五十六首

卷二十七

詩七十九首

卷二十八

詩七十五首

卷二十九

詩五十首

卷三十

詩三十三首

卷三十一

詩五十一首

卷三十四 詞出

賦六首

卷三十二

詩五十七首

楚辭四首

卷三十三

詩三十九首

詞

卷三十五 詞出

石湖詩集三十三卷。凡古今各體詩一千九百一十六首。范文穆公手自編定。宋嘉泰間。其子莘等刻以行世。合詩文凡百有三十卷。明時曾已重刻。而流傳頗少。又有活板印本。殘闕甚多。今藏書家多有抄本。而訛舛異同。魯魚錯出。吾友金子亦陶所藏。從宋板抄得。更爲廣集諸家。較勘精密。可稱善本。茲先刻其詩集。以公諸同好。卷帙前後悉依原本所編。其間譌字如井堊木刊之誤。堊爲堊。弟靡波流之誤。弟爲弟。皆略爲改正。所有一二瀟漫之處。無從辨證。姑闕之以俟考。外附賦楚辭一卷。樂府一卷。賦本在詩前。今附於詩後者。集以詩名。從其類也。嗟乎。自文穆公至今四百有餘年矣。而詩篇在是。聲光爛然。亦可以見吳下之風流。其淵源至今弗絕也。康熙戊辰八月中秋前一日。依園主人謹識。

小畜集卷十二目錄

詩行

謝宣賜御草書急就草并朱邸舊集詩

應制皇帝親試貢士詩

謝政事王侍郎伏日送冰

酬贈田舍人

對雪示嘉祐

送姚著作之任宣城

送晁監丞赴婺州關市之役

還揚州許書記家集

調處才上人

和張校書吳縣廳前冬日雙開牡丹

和馮中允爐邊偶作

賦得南山行送馮中允之辛谷冶按獄

小畜集 卷十二目錄

烏啄瘡賦詞

一七八

石湖居士詩集卷一

嗣協迂客

吳郡 顧嗣臯漢魚 重訂

嗣立俠君

行路難

贈君以丹棘忘憂之草。青棠合歡之花。馬腦遊仙之夢枕。龍綜辟寒之寶紗。天河未翻月未落。夜長如年引春酌。昔人安在空城郭。今夕不飲何時樂。

西江有單鵠行

西江有單鵠。託身萬里雲。猥爲稻粱謀。墮此鷗鷺羣。朝遊楓葉杪。暮宿蘆花根。懷安浦溆暖。忘記雲海寬。忽有孤征鴻。驚飛落江濱。眼明見黃鵠。解后傾情真。羽毛雖不同。意氣頗相親。言鵠有六翮。何不高飛翻。水鳥不足羣。朝暮徒嘲喧。相將乘風去。一上盤秋旻。渴飲潁露滋。飢吸晴霞暎。方知翅翎俊。可以凌埃塵。東風昨解凍。春光暖如薰。陽鳥當北鄉。行止倏已分。儻欲相逐去。關山隔吳秦。兩鳥竟分飛。鳴聲動行人。豈不有歲晚。鴻當復來賓。但愁山海闊。岐路多糾紛。復來失故道。那得相知聞。鴻歸有儔侶。鵠住長悲辛。

車遙遙篇

車遙遙。馬憧憧。君遊東山東復東。安得奮飛逐西風。願我如星君如月。夜夜流光相皎潔。月暫晦。星常明。

留明待月復三五共盈盈

放魚行

水落塘枯魚臥陸。小兒抱取不濡足。昂藏赤鯁亦垂頭。背負玄鱗三十六。家人濫碣不辭勞。云有素書金錯刀。嗟予贖放豈微福。忍把汝命供吾饕。如今已脫張胡子。好上龍門飲湖水。不然翻起載飛仙。切莫顛狂稱長史。

晚步東郊

水墨依林寺。青黃負郭田。斜陽猶滿地。片月早中天。策策鴉飛急。冥冥樹影圓。西山元自好。那更著雲煙。

元夜憶羣從

愁裏仍蒿徑。閒中更蓼門。青燈聊自照。濁酒爲誰溫。隙月知無夢。窗梅寄斷魂。遙憐好兄弟。飄泊兩江村。

登西樓

少年豪氣合摧鋒。青鬢朱顏萬事慵。疇昔四愁無夢到。及時一笑有誰供。詩情飲興如雲薄。草色花光似酒醺。千里春心吟不盡。下樓分付晚煙鐘。

不寐

南風釀卑溼。滑滑病履鳥。竟日隱几坐。拳局不得適。丹田恍瀕洞。銀海眩眇黑。脾弱類跨鞍。臂強如運甓。合體競酸嘶。莫夜輒增極。奏牀不得眠。耿耿到明發。黃嬭共住久。來夢乃其職。睡魔吾故人。曩是不速客。招呼各懷寢。莫効尺寸力。周公無由來。咫尺今古隔。彭尸不得去。罡騎無行色。主客兩愁緒。虛室浪生白。

人言老禪師，兩脅不到席。茲事恐未暇，但願了今夕。平生北窗眠，栩栩卽聖域。睡優吾所慕，行步亦虧息。

河豚歎

鱸生藜苳腸，食事一飽足。腥腐色所難，況乃衷飮毒。彭亨強名魚，殺氣孕慘贖。既非養生具，宜謝砧几餽。吳儂真差事，網索不遺育。捐生決下箸，縮手汗童僕。朝來里中子，饒吻不待熟。濃睡喚不醒，已落新鬼錄。百年三寸咽，水陸富有款。一物不登俎，未負將軍腹。爲口忘計身，饕死何足哭。作俑者誰與，至今走末俗。或云先王意，除惡如薶菽。逆梟與毒梟，歲歲參幣玉。芟夷入薦羞，蓋欲殲種族。生死有定數，斷命烏可續。適丁是時者，未易一理局。鼉鼎子公怒，羊羹華元劾。異味古所珍，無事苦畏縮。駢頭訶此語，戒諭祇取瀆。聾盲死不悟，明知諒已燭。

續長恨歌七首

金杯激灑曉粧寒，國色天香勝牡丹。白鳳詔書來已暮，六宮鉛粉半春闌。紫薇金屋閉春陽，石竹山花却自芳。莫道故情無覓處，領巾猶有隔生香。聞道蓬壺重見時，瘦來全不耐風吹。無端却作塵間念，已被仙官聖得知。別後相思夢亦難，東虛雲路海漫漫。仙凡頓隔銀屏影，不似當時取次看。人似飛花去不歸，蘭昌宮殿幾斜暉。百年只有雲容姊，留得當時舊舞衣。驪山六十二高樓，突兀華清最上頭。玉羽川長湘浦暗，三郎無事更神遊。帝鄉雲馭若爲留，八景三清好在不。玉笛不隨雙鶴去，人間猶得聽梁州。